



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՎ

ՈՐՈՇՈՒՄ N 03/2023

ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԱՌԵՐԵՎՈՒՅԹ ԽԱԽՏՄԱՆ  
ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

ք. Երևան

02 նոյեմբերի 2023 թվական

Կոռուպցիայի կանխարգելման հանձնաժողովը, կազմով՝ Հայկուիի Հարությունյանի, Արամայիս Փաշինյանի, Նարեկ Համբարձումյանի, Մարիամ Գալստյանի և Լիլիթ Ալեքսանյանի (այսուհետ՝ Հանձնաժողով), ուսումնասիրելով 2023 թվականի հոկտեմբերի 26-ին Հանձնաժողովին հասցեագրված Գլխավոր դատախազ Աննա Վարդապետյանի թիվ 01//19720-2023 գրությունը.

**պարզեց**

1. 2023 թվականի հոկտեմբերի 26-ին Գլխավոր դատախազ Աննա Վարդապետյանի կողմից Հանձնաժողովին հասցեագրվել է թիվ 01//19720-2023 գրությունը ՀՀ գլխավոր դատախազության պատիժների և հարկադրանքի այլ միջոցների կիրառման օրինականության նկատմամբ հսկողության վարչության դատախազ Գարեգին Իսախանյանի կողմից «Դատախազության մասին» օրենքի 49-րդ հոդվածով սահմանված սահմանափակումները կամ անհամատեղելիության պահանջները պահպանված կամ չպահպանված լինելու վերաբերյալ եզրակացություն ստանալու նպատակով:
2. Գրությամբ ներկայացվել է հետևյալ տեղեկատվությունը.
  - 1) 2023 թվականի օգոստոսի 10-ին ՀՀ քննչական կոմիտեի Արարատի մարզային քննչական վարչություն է ստացվել Պետական եկամուտների կոմիտեի հետքաննության և օպերատիվ հետախուզության վարչության պետի

պաշտոնակատար Տիգրան Նազարբեկյանի հաղորդումը՝ հետևյալ բովանդակությամբ. «ՊԵԿ իրավաբանական վարչության պետի թիվ Ն/11-5/138289-2022 գրությամբ «ԲԱՐ» ՍՊ ընկերության (<ՎՀՀ՝ 00877975, պետական հաշվառման համար՝ 282.110.119379, գրանցման ամսաթիվ՝ 27.06.2012թ.) վերաբերյալ փաստաթղթեր են ստացվել այն մասին, որ Պետական եկամուտների կոմիտեի **կողմից 2022 թվականի օգոստոսի 3-ին դիմում է ներկայացվել ՀՀ սնանկության դատարան՝ ընկերությանը սնանկ ճանաչելու պահանջի վերաբերյալ:**»:

- 2) Սնանկության դատարանը 2022 թվականի նոյեմբերի 16-ի վճռով մերժել է «ԲԱՐ» ՍՊ ընկերությանը (այսուհետ նաև՝ Ընկերություն) սնանկ ճանաչելու՝ Պետական եկամուտների կոմիտեի պահանջը (Գործ N ՍնԴ/2291/04/22):
  - 3) Միաժամանակ, գործի նյութերն ուղարկվել են ՀՀ քննչական կոմիտեի Արարատի մարզային քննչական վարչություն՝ ՀՀ քրեական օրենսգրքի 288-րդ հոդվածի (**կեղծ սնանկություն**) հատկանիշներով քրեական վարույթ նախաձեռնելու հարցը որոշելու համար: ՀՀ քննչական կոմիտեի Արարատի մարզային քննչական վարչության կողմից որոշում է կայացվել քրեական վարույթ չնախաձեռնելու վերաբերյալ:
  - 4) ՀՀ քննչական կոմիտեի Արարատի մարզային քննչական վարչության կողմից վարույթ չնախաձեռնելու արձանագրությանը կցված փաստաթղթերի ուսումնասիրությամբ պարզվել է, որ «ԲԱՐ» ՍՊ ընկերության **53% բաժնեմասի սեփականատեր է հանդիսանում Գարեգին Իսախանյանը:**
  - 5) Արարատի մարզի դատախազության դատախազ Վ. Առաքելյանի կողմից 2023 թվականի հոկտեմբերի 23-ին ներկայացված հաղորդման ուսումնասիրության արդյունքում ՀՀ գլխավոր դատախազի 2023 թվականի հոկտեմբերի 25-ի որոշմամբ Գարեգին Իսախանյանի նկատմամբ հարուցվել է կարգապահական վարույթ՝ «Դատախազության մասին» օրենքի 49-րդ հոդվածով սահմանված անհամատեղելիության պահանջները չպահպանելու հիմքով:
3. Գարեգին Իսախանյանը 2017 թվականի հուլիսի 1-ից զբաղեցրել է ՀՀ գլխավոր դատախազության պատիժների և հարկադրանքի այլ միջոցների կիրառման

օրինականության նկատմամբ հսկողության վարչության դատախազի պաշտոնը, իսկ 2022 թվականի մայիսի 22-ից՝ նույն վարչության ավագ դատախազի պաշտոնը:

4. Գարեգին Իսախանյանի կողմից ներկայացված 2021 և 2022 թվականների «Պաշտոնատար անձի գույքի, եկամուտների, ծախսերի և շահերի» տարեկան հայտարարագրերի «Ե.1 Մասնակցությունն առևտրային կազմակերպություններում» բաժիններում տվյալներ են ներկայացվել Ընկերության կանոնադրական կապիտալում 53% բաժնեմասնակցության վերաբերյալ: Նշված Հայտարարագրերի «Ե.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում տվյալներ չեն ներկայացվել Ընկերության կանոնադրական կապիտալի 53% բաժնեմասը հավատարմագրային կառավարման հանձնելու վերաբերյալ:

5. Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալների համաձայն՝ «ԲԱՐ» ՍՊԸ-ն հանդիսանում է առևտրային կազմակերպություն, որը հիմնադրվել է 2012 թվականի հունիսի 27-ին: Գարեգին Իսախանյանը **2014 թվականի դեկտեմբերի 25-ից** հանդիսանում է «ԲԱՐ» ՍՊ Ընկերության **53% բաժնեմասի սեփականատեր**: Ընկերության լուծարման գործընթացում գտնվելու, կամ գործունեության դադարման մասին տեղեկություններ միասնական գրանցամատյանում առկա չեն:

«Դատախազության մասին» օրենքի 49-րդ հոդվածի 1-ին մասի համաձայն՝ դատախազը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից»:

**«Հանրային ծառայության մասին» օրենքի** 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ քաղաքական, վարչական, **ինքնավար** և հայեցողական:

Նշված օրենքի 7-րդ հոդվածում սահմանված **ինքնավար պաշտոնների** շրջանակում ներառված է նաև դատախազի պաշտոնը:

Նշված օրենքի 31-րդ հոդվածի 5-րդ մասի համաձայն՝ **հանրային պաշտոն** զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա ընթացքում**, պարտավոր են ապահովել սույն հոդվածի 1-ին մասով սահմանված պահանջների կատարումը:

Նույն հոդվածի 7-րդ մասով սահմանվում է ձեռնարկատիրական գործունեությամբ զբաղվելու հասկացությունը համաձայն որի՝ սույն օրենքի իմաստով **ձեռնարկատիրական գործունեություն է** համարվում՝

(...) **առևտրային կազմակերպության մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման կամ չի գերազանցում սույն հոդվածի 8-րդ մասի 11-րդ կետում նշված թույլատրելի բաժնեմասնակցությունը:

«Կոռուպցիայի կանխարգելման հանձնաժողովի մասին» օրենքի 24-րդ հոդվածի 1-ին մասի 1-ին կետի համաձայն՝ Հանձնաժողովը քննում և լուծում է պետական պաշտոն զբաղեցնող անձանց, համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց կողմից «Հանրային ծառայության մասին» Հայաստանի Հանրապետության օրենքով սահմանված անհամատեղելիության պահանջների և այլ սահմանափակումների, ինչպես նաև պետական պաշտոն զբաղեցնող անձանց (բացառությամբ պատգամավորի, դատավորի, Բարձրագույն դատական խորհրդի անդամի, դատախազի, քննիչի), համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց վարքագծի կանոնների խախտումների և շահերի բախման դեպքերի վերաբերյալ դիմումներ:

«Կոռուպցիայի կանխարգելման հանձնաժողովի մասին» օրենքի 27-րդ հոդվածի 2-րդ մասի համաձայն՝ Հանձնաժողովը պետական պաշտոն զբաղեցնող անձանց, համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց կողմից «Հանրային ծառայության մասին» Հայաստանի Հանրապետության **օրենքով**

**սահմանված անհամատեղելիության պահանջների**, այլ սահմանափակումների առերևույթ խախտումների, ինչպես նաև պետական պաշտոն զբաղեցնող անձանց (բացառությամբ պատգամավորի, դատավորի, Բարձրագույն դատական խորհրդի անդամի, դատախազի, քննիչի), համայնքների ղեկավարների, նրանց տեղակալների, Երևան համայնքի վարչական շրջանների ղեկավարների, նրանց տեղակալների պաշտոն զբաղեցնող անձանց կողմից վարքագծի կանոնների առերևույթ խախտումների, բացառությամբ նվերներ ընդունելու սահմանափակումներին առնչվող խախտումների, կամ շահերի բախման **առերևույթ դեպքերի առկայության պարագայում հարուցում է համապատասխան վարույթ:**

Հաշվի առնելով նշված հանգամանքները և ղեկավարվելով «Կոռուպցիայի կանխարգելման հանձնաժողովի մասին» 27-րդ հոդվածի 1-ին մասի 1-ին կետով, 22-րդ հոդվածի 1-ին մասի 2-րդ կետով և 31-րդ հոդվածի 2-րդ մասով, Հանձնաժողովը.

### **Ո Ր Ո Շ Ե Ց**

1. ՀՀ գլխավոր դատախազության պատիժների և հարկադրանքի այլ միջոցների կիրառման օրինականության նկատմամբ հսկողության վարչության դատախազ Գարեգին Իսախանյանի կողմից անհամատեղելիության պահանջների առերևույթ խախտման հիմքով հարուցել վարույթ:
2. Սույն որոշումը եռօրյա ժամկետում ուղարկել ՀՀ գլխավոր դատախազության պատիժների և հարկադրանքի այլ միջոցների կիրառման օրինականության նկատմամբ հսկողության վարչության դատախազ Գարեգին Իսախանյանին և ՀՀ գլխավոր դատախազ Աննա Վարդապետյանին:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒՆԻ ՀԱՐՈՒԹՅՈՒՆՅԱՆ